

# 1 TESALONICENSES IACHTOJ TLAJCUILOL ON APÓSTOL SAN PABLO PARA ON TESALONICENSES

*Pablo niman itequipanoj caxihuan quintlajcuil-huiyaj on tlaneltoquej ne Tesalónica*

<sup>1</sup> Nejhua, Pablo, ihuan Silvano niman Timoteo, niquijcuilohua yejhua in tlajcuilolamatl para on tlaneltoquej yejhuan nemij itech Dios toTajzin niman toTeco Jesucristo ne ipan on tiopan yejhuan oncaj ipan on hueyican Tesalónica. Ma Dios toTajzin niman toTeco Jesucristo mehmacacan tlatiochihualistli niman yolsehuilistli.

*On chanejquej Tesalónica quitemacaj se ejemplo  
ica intlaneltoc*

<sup>2</sup> Nochipa ticmacaj tlaxtlahuijli Dios para nochimej nemejhuamej, niman nochipa temechelnamiquij ican tooración.

<sup>3</sup> Temechelnamiquij ixpan Dios toTajzin quen ijqui ipampa nemotlaneltoc nenquichihuaj miyec tequitl, niman quen ijqui ipampa nemotetlajos-tatlalis\* nenquitequipanohuaj, niman quen ijqui ipampa nemotlamachalist† itech toTeco Jesucristo nenmelajcanemij.

<sup>4</sup> Nocnihuan, Dios mechtla jsojtl a nemejhuamej. Niman ticmatztoquej ica yejhua omechtlapenij,

---

\* **1:3** su amor    † **1:3** esperanza de ustedes

<sup>5</sup> pampa ijcuac tejhuamej otemechijlijquej on cuajli tlajtojli yejhuan quitemaca temaquixtilistli xotemechpanextilijquej san ican tlajtlajtohuilistli, yej no ican poder, niman ican Espíritu Santo. Niman no cuajli nenquiyolmatztoquej ica in tlamachtijli yejhua tlen melahuac. Cuajli nenquimatztoquej ica quen ijqui titohuicayaj nemohuan ipampa on tlen cuajli para nemejhuamej.

<sup>6</sup> Nemejhuamej onenquitocaquej toejemplo niman iejemplo toTeco. Niman masqui onenquipixquej miyec tlajyohuclistli, onenquiselijquej on tlamachtijli ican paquilstli on yejhuan omechmacac on Espíritu Santo.

<sup>7</sup> Ijcon, tej, onemochijquej ejemplo para nochimej on tlaneltocaquej ne impan Macedonia niman Acaya.

<sup>8</sup> Ijcon nemejhuamej onenquiteitijquej itemachtil toTeco, niman xsan Macedonia niman Acaya, yej nochihuiyan quimatztoquej ica nemotlaneltoc yejhuan nemejhuamej nenquipiaj itech Dios. Yejhua ica aman xoquitlaj ticpiaj tlinon más tiquimijlisquej.

<sup>9</sup> Aman sa no yejhamej tlajtlajtohuaj ica nemonemilis ijcuac otemechnojnotzcaj. Niman quitetlajtlajtohuiliaj quen ijqui cuajli onentechselijquej, niman quen ijqui onenquintlalcahuijquej on tlamachijchijhualtin nemotojtajtzitzihuan catcaj para onenquitlacamatquej Dios, niman opeu nenquitequipanohuaj on yejhuan melahuac Dios niman yejhuan nochipa nemí.

<sup>10</sup> No ijqui quijtohuaj quen ijqui nemejhuamej

nenquichixtoquej ma huajla ne ipan ilhuicac iConetzin Dios yejhuan oquiyolihuitij niman oquetzteu ne ipan itlalcon. Jesús, teConeu itech Dios, yejhua techmaquixtia ipan on temojtij tlajyohuilistli yejhuan huajlas.

## 2

### *Itequiu Pablo ne Tesalónica*

<sup>1</sup> Niman sa no nemejhuamej nenquimatztoquej, nocnihuan, ica xsanencaj otomechnojnotzquej.

<sup>2</sup> Nemejhuamej ye nenquimatztoquej ica achtopa otechijixnamiquej ican tlahuejli, niman otechhuijhuicaltijquej ne ipan on hueyican Filipos. Masqui yejhuamej ijcon otechchihuilijquej, Dios otechpalehuij para otomechmacaquej on cuajli tlajtojli yejhuan quitemaca temaquixtilistli ican nochí confianza ne Tesalónica. In oticchijquej masqui quejecohuayaj techteltisquej.

<sup>3</sup> Otomechchicajcanojnotzquej xican on tlamachtijli yejhuan xmelahuac, nion xican on tlen xchipahuac, nion xitlaj\* ica ocse yejhuan ica otomechcajcayajquej.

<sup>4</sup> Yej nochí ocse tlamantic. Dios achtopa cuajli otechtlatlatac, niman quemaj oquitlalij iyojlo totech para otechmactilij on cuajli tlajtojli yejhuan quitemaca temaquixtilistli. Titemachtiaj xpara on tlacamej ma paquican tohuan, yej para Dios ma paqui tohuan yejhuan techita cuajli ipan toyojlo.

---

\* **2:3** nada; coxtla

**5** Nemejhuamej nenquimatztoquej ica xqueman otomechyechnojnotzquej ican sanoyej<sup>†</sup> cualtzin tlajtojli para xtechtlaejsojtlacan<sup>‡</sup>, nion xotictequitiltijquej tlajtojli yejhuan ica huelis tictlanisquej tomin. Yehua ica in, Dios yejhua ixpantiticaj.

**6** Tejhuamej xqueman ticnequij para on tlacamej ma techyectenehuacan, tla nemejhuamej noso ocsequimej, masqui pampa ttiapóstoles Cristo tihuelisquiaj temechtlajtlanilisquiaj.

**7** Yej ocse tlamantic, tejhuamej temechpiaj quen itlaj yejhuan selic, quen yejhua on nantli yejhuan quimiscaltia iconetzitzihuan ican tetlajsojtlalistli.

**8** Nemejhuamej temechpialiaj miyec tetlajsojtlalistli yejhuan hasta ticnequisquiaj temechmacasquiaj, xsan yejhua on cuajli tlajtojli yejhuan quitemaca temaquixtilistli, yej no hasta tonemilis pampa tejhuamej otomechtlajsojtlaquej sanoyej<sup>§</sup>.

**9** Nocnihuan, nemejhuamej nenquelnamiquij quen ijqui otitequitquej niman oticchijquej canica para oticlanquej tonemilis. Titequitiyaj ican tonajli niman yehuajli para nion aquin de nemejhuamej onemechtequimacaquej chica tejhuamej temechmachtiayaj on itemachtil Dios yejhuan quitemaca temaquixtilistli.

**10** Nemejhuamej onenquitaquej, niman Dios no, ica otitohuicaquej chipahuac niman yolmelajquej nemotech yejhuan nentlaneltocaj. Xacaj huelis techtlaejtlacolmacas.

<sup>†</sup> 2:5 muy    <sup>‡</sup> 2:5 nos amen    <sup>§</sup> 2:8 mucho

**11** No ijqui nenquimatztoquej ica otomechijlijquej cada se de nemejhuamej quen quichihua se tajtli ihuan iconehuan. Otemechyolejquej niman otomechyolpactijquej.

**12** Niman no otemechtlactitijquej para xmo-huicacan quen mechtocarohua nemohuicasquej, yejhuan neniconehuan Dios aquin omechnotz para nenquipiasquej nemilistli ne campa yejhua tlamandarohua niman oncaj hueyilistli.

**13** Niman no ticmacatoquej tlaxtlahujli Dios pampa ijcuac nemejhuamej onenquiselijquej itlajtol yejhuan tejhuamej otomechmachtijquej, onenquiselijquej quen itlajtol niman xquen itlajtol yacaj tlacatl. Niman melahuac yejhua itlajtol Dios. Niman on itlajtol tequiti nemohuan yejhuan nentlaneltocaj.

**14** Nocnihuan, on tlen onochiu impan on tlanel-tocaquej itech Dios ne Judea yejhuan tecone-huan itech Cristo Jesús, no ijqui onochiu nemohuan. Omechtlahuelitaquej niman omechtlay-ohuiltijquej yejhuan on nemochanejcahuan sa no ijqui quen on iconehuan Dios ne Judea otlajy-ohuijquej intech on inchanejcahuan hebreos.

**15** Yejhuan on hebreos oquimictijquej toTeco Jesús niman on tiotlajtojquej. On hebreos otech-totocaquej, niman yejhuan xquipactiaj Dios. Nemij quen tlahuelicniutin intech nochimej tla-camej.

**16** Techteltiaj tiquinnojnotzasquej on yejhuan xhebreos para yejhuan on ma nomaquixtican. Ijcon quen nochipa quichihuaj, más quimiyequil-iaj intlajtlacol hasta campa xoc hueli. Pero aman ye cuajli on tlahuel Dios impan yohuajlaj.

*Pablo ocsejpa quinequi cominnojnotzas on chanequej Tesalónica*

<sup>17</sup> Nocnihuan, masqui tla xtemechitayaj ijcuac temechtlalcahuiyayaj ipan achijtzin tonaltin, tejhuamej nochipa temechpiayaj ipan toyoljo, niman sanoyej ticnequiyaj tiasquej temechontasquej.

<sup>18</sup> Ticnequiyaj tiasquej hasta nejhua, Pablo, más de sejpa oniquejecoj nias. Pero nochipa ijcuac tiasnequiyaj, on diablo xtechcahuiliaya.

<sup>19</sup> Tla ijcon, tej, ¿aquinomej yes on yejhuan inca ticipiasquej totlamachalis, topaquilis niman to-coronas yejhuan techyolpactis, tla xsa no nemehuamej? Melahuac nentopaquilis yesquej ijcuac toTeco huajnocuepas, niman ijcuac titoteititisquej ixpan.

<sup>20</sup> Quemaj on melahuac ica nemejhuamej nentohueyilis yesquej niman nentopaquilis yesquej.

### 3

<sup>1</sup> Quemaj pampa xoc ohuel oticxicojquej más, otictlalijquej toyoljo para toseltimej titocahuasquej nican Atenas,

<sup>2</sup> niman quemaj otictitlanquej nemotech Timoteo. Yejhua tocniu niman itequitcau Dios para temachtia on cuajli tlajtojli itech ica Cristo. Otictitlanquej nemotech para omechyolchicahuato niman omechyolehuato ipan nemotlaneltoc,

<sup>3</sup> para ma ca yacaj notzinquixtis ipampa on tlajyohuilstli. Sa no nemejhuamej nenquimatz-toquej ica oncaj tiquijyohuisquej yejhua in tlajtلامach\*.

---

\* **3:3** cosas

**4** Ijcuac oc<sup>†</sup> nemohuan tinemiyaj, otomechijlijquej ica ticpiasquej on tlen tepajsolohuilistli tecocoj, niman ijqui onochiu quen nenquimatztoquej.

**5** Yejhua ica, ijcuac nejhua xonihuel más onicxiccoj, onitlatitlan para onicmat quen ijqui nennemij ipan nemotlaneltoc. Ninomojtiaya nicmatis ica on diablo yomechtlatlatac, niman totequiu sanencraj oticchijquej.

**6** Pero aman Timoteo yohuajnocuepato ne nemotech, niman techajcuilia cuajli tlajtojli ican nemotlaneltoc niman nemotetlajsojtlalis<sup>‡</sup> yejhuan nemejhuamej nenuipiaj. Otechijlij ica nochipa nentechelnamiquij ican pactli, niman ica sanoyej<sup>§</sup> nenuinequij para nentechitasquej sa no ijqui quen tejhuamej.

**7** Yejhua ica, nocnihuan, masqui oticpixquej tlajyohuilistli niman on pajsolohuilistli tecocoj, oticpixquej miyec teyoltlalijli ijcuac oticmatquej ica nemejhuamej cuajli nenyahuij ican nemotlaneltoc.

**8** Aman quen onentechyolitijquej ijcuac oticmatquej ica nemejhuamej cuajli nennemij itech toTeco.

**9** Pampa onentechmacaquej miyec paquillistli ixpan Dios, ¿hasta quen ijqui, tej, tihuélisquej ticmacasquej miyec tlaxtlahuijli toDios nemopampa?

**10** Ican tonajli niman yehuajli tictlajtlaniliaj Dios ma techcahuili titosentlalisquej para titotasquej ocsejpa, niman ticajxitisquej tlinon oc polihui ipan nemotlaneltoc.

<sup>†</sup> 3:4 todavía; sanquen

<sup>‡</sup> 3:6 su amor

<sup>§</sup> 3:6 mucho

<sup>11</sup> Ma sa no yejhua Dios toTajtzin niman toTeco Jesucristo ma techpalehui para tihuelisquej tiasquej temechontasquej.

<sup>12</sup> Niman ma toTeco mechyolchicahua para más nenquimiyequilisquej on tetlajsojtlalistli ihuan ocsequimej niman para nochimej tlacamej, ijcon quen tejhuamej temechtlajsojtlaj.

<sup>13</sup> Ma toTeco Jesús ma mechyolmelajcapia, niman ma mechchipahua para ma ca nenquipiasquej ijtlacohualistli ixpan Dios toTajtzin ijcuac huajlas toTeco Jesús ihuan iyolchipajcahuan tlaneltocaquej.

## 4

### *Nemilstli yejhuan quipactia Dios*

<sup>1</sup> Sa yejhua in, nocnihuan, sanoyej temechtlajtlaniliaj niman temechnojnotzaj yejhua ica in ican itocatzin toTeco Jesús, ica sa no ijqui quen tejhuamej otemechititijquej nemejhuamej para nenquipactisquej Dios, nochipa ijqui xchihuacan más.

<sup>2</sup> Nemejhuamej nenquimatztoquej on tlanahuatiltin yejhuan otemechmacaquej ican itlanahuatil toTeco Jesús.

<sup>3</sup> Dios quinequi xmochipahuacan niman ma ca xahuilnemican.

<sup>4</sup> Yej cada se ma quimati quen ijqui quipias isihuau ican chipahualistli niman ican tetlacaital-istli.

<sup>5</sup> Niman ma ca quipias ican on elehuilistli\* de telpocamej nion ican on xcujli nequilibistli ijcon

---

\* **4:5** deseos

quen quichihuaj on tlacamej yejhuan xquixmatij Dios.

<sup>6</sup> Ma ca yacaj ixcoejehuas niman quichihuas on tlen xcuajli itech icniu, pampa noch ica on toTeco mechcastigaros chicahuac, ijcon quen tejhuamej yotemechijlijcaj.

<sup>7</sup> Dios, tej, xotechnotz para ticchihuasquej on tlen xchipahuac, yej para ticchihuasquej on tlen chipahuac.

<sup>8</sup> Ijcon, tej, yejhuan xquiselia in cuajli temachtilistli xquiselia yacaj ocse tlacatl, yej sa no Dios yejhuan techmaca Espíritu Santo.

<sup>9</sup> Para temechtlajcuilhuisquej más yejhua ica on quen ijqui nemotlajsojtlasquej<sup>†</sup> quen icniutin itech Cristo, xoc nonequi, pampa Dios cuajli yomechmachtij.

<sup>10</sup> Niman melahuac nenquintlajsojtlaj nochimej on tocniuhan yejhuan chantij nochihuiyan ne Macedonia. Pero sanoyej<sup>‡</sup> temechtlajtlaniliaj, nocnihuan, ica nemotetlajsojtlalis más ma miyequiya.

<sup>11</sup> Xchihuacan canica para nennemisquej ican yolsehuilistli. Ma ca nemocalactisquej campa nemehuamej xmechtocarohua, niman ma ca xtatzijquej, yej xtequitican ican nemomahuan ijcon quen tejhuamej otemechmachtijquej.

<sup>12</sup> Ijcon xchihuacan para mechtlacaitasquej on yejhuan xtlaneltocaj niman para ma ca yacaj nenquiltajtlanilisquej itlaj ica mechpalehuis.

### *Ocsejpa huajlas toTeco*

---

<sup>†</sup> 4:9 amarse    <sup>‡</sup> 4:10 mucho

<sup>13</sup> Nocnihuan, ticnequij xmatican tlinon impan nochihua on mimiquej para ma ca xmajmanacan quen ocsequimej yejhuan xquipiaj tlamachalistli.

<sup>14</sup> Ticneltocaj ica Jesús omic niman onoyoli-huitij<sup>§</sup> niman onoquetzteu. Yejhua ica, tej, ticneltocaj ica Dios quinhuicas ihuan Jesús on tlanelto-caquej yejhuan yomiquej ijcuac huajlas ocsejpa.

<sup>15</sup> Yejhua ica nemejhuamej temechijliaj ican itlajtol toTeco ica tejhuamej yejhuan titocahuasquej ican tonemilis hasta ijcuac huajlas toTeco, xachtoj techhuicas de on yejhuan yomiquej.

<sup>16</sup> Sa no toTeco huajtemos ne ilhuicac ican tlajtojli de tequihuajquetl, ican itlajtol on ilhuicactequitquetl\* yejhuan yecatzticaj, niman ican itrompeta Dios. Ijcuacon on tlaneltocaquej yejhuan yomiquej, Cristo achtapa yejhamej quinyolihuitis niman quinquetztehuas.

<sup>17</sup> Quemaj yejhuan titocahuasquej ican tonemilis techhuicas inhuan yejhamej ne ipan moxtli para ticonnam quisquej toTeco ne ipan ajacatl. Ijcon tinemisquej ihuan toTeco para nochipa.

<sup>18</sup> Yejhua ica, tej, xmoyoltlalican sequimej ihuan ocsequimej ica in tlajtojli.

## 5

<sup>1</sup> Nocnihuan, xnonequi temechijcuilo huilisquej ica on ijcuac huajlas toTeco, nion ica on tlen achtuj nochihuas ijcuac yejhua huajlas.

---

§ **4:14** resucitó; onoyolitij      \* **4:16** ángel: Angeles tequitij ne ilhuicac niman nican ipan in tlalticaptli.

<sup>2</sup> Nemejhuamej cuajli nenquimatztoquej ica on tonajli ijcuac ilhuiu yes toTeco, yejcos ijcuac xacaj quimachixticaj, ijcon quen on tlachtequetl huajlau ijcuac tlayohua.

<sup>3</sup> Ijcuac on tlacamej quijtojtiasquej: “Oncaj yolsehuilistli niman xoncaj on tlen techmictis”, nimantzin huajlas tlaxoxotonilistli impan yejhuamej niman xhuelis yejtehuasquej. Nochihuas quen nochihua ijcuac on tlen tecoco nimantzin huajlau ipan on sihuatl yejhuan quinemitia iconetzin.

<sup>4</sup> Pero nemejhuamej, nocnihuan, xnennemij ipan tlayehuajlotl. Yejhua ica on tonajli ijcuac ilhuiu yes toTeco xhuelis mechmojcatlachaltis quen yacaj tlachtequetl,

<sup>5</sup> pampa nochimej nemejhuamej nentecone-huan ipan tlahuilji niman tonajli. Nemejhuamej xnentecone-huan ipan tlayohua nion ipan tlayehuajlotl.

<sup>6</sup> Yejhua ica, tej, ma ca ma ticochican quen ocsequimej, yej ma titlajtlachixtiacan ican cuajli totlamachilis.

<sup>7</sup> Yejhuan cochi, cochi ijcuac tlayohua, niman yejhuan tlahuani, quen tlahuanticaj ijcuac tlayohua.

<sup>8</sup> Pero tejhuamej yejhuan titecone-huan ipan tonajli, ica oncaj ma nochipa tinemican ican cuajli totlamachilis. Ma titotzacuicilan ican totlaneltoc niman totetlajsojtlalis\* ijcon quen on soldado notzacuilia iyelpan ican se escudo. Niman no ma ticpiacan tlamachalistli† de temaquixtilistli sa no ijqui quen on casco yejhuan ica quitzacuilia

---

\* **5:8** nuestro amor    † **5:8** esperanza

itzontecón se soldado.

<sup>9</sup> Ijquin ma ticchihuacan, pampa Dios xotechtalij para ticselisquej itlahuel, yej para ticselisquej temaquixtilistli itechcopia toTeco Jesucristo.

<sup>10</sup> Jesucristo topampa omic para san secan ihuan tinemisquej, san quen ijqui tla tiyolihuitiasquej noso tla timictiasquej ijcuac huajlas.

<sup>11</sup> Yejhua ica, xmoyolehuacan se ihuan ocse, niman xmoyolchicahuacan ican tlaneltoctli ihuan ocsequimej ijqui quen nenquichijtoquej.

*Pablo quintlacanonotza on tocnihuan itech Cristo*

<sup>12</sup> Nocnihuan, sanoyej temechtlajtlaniliaj xquimpialican tetlacaítalistli on yejhuan tequitij nemotzajlan, yejhuan mechyeceñaj niman mechmelajcatlaliaj, pampa yejhamej quipiaj tlanahuatiijli itech toTeco.

<sup>13</sup> Xquintlacamatican niman xquintlajso-  
tlacan‡ sanoyej ipampa on tequitl yejhuan quichihuaj. Xnemican ican yolsehuilistli sequimej ihuan ocsequimej.

<sup>14</sup> No ijqui sanoyej temechtlajtlaniliaj, nocnihuan, ica xquinchicajcanotzacan on yejhuan xquinequij tequitisquej; xquinyolehuacan on yejhuan notzinquixtiaj; xquimpalehuican on yejhuan xcojtiquej ipan intlaneltoc, niman xpiacan ijyohuclistli inhuan nochimej.

<sup>15</sup> Xmotacan sa no nemejhamej. Ma ca yacaj quicuepilis ican tlen xcuajlí itech on tlen xcuajlí, yej nochipa xchihuacan on tlen cuajli para on tocnihuan niman para nochitlacatl.

---

‡ 5:13 ámenlos

<sup>16</sup> Nochipa xnemican ican paquelistli.

<sup>17</sup> Nochipa xchihuacan oración.

<sup>18</sup> Ican nochí tlen nochihuas, xmacacan tlaxtlahuijli Dios, pampa yejhua ijqui quinequi para xchihuacan nemejhuamej yejhuan nenquinelto-caj Cristo Jesús.

<sup>19</sup> Ma ca xsehuican on itliu on Espíritu Santo.

<sup>20</sup> Niman ma ca xquintlachichihuilican on yejhuan quiteijliaj on tiotlajtojli yejhuan quiseliaj itech Dios.

<sup>21</sup> Pero xquixtlalocan nochí, niman xquejehuacan nochí tlen cuajli.

<sup>22</sup> Niman xtlalcahuican nochí tlajtlamach§ tlen xcuaqli.

<sup>23</sup> Sa no Dios, on yejhuan mechmaca yolsehuistli, ma mechyochipahua nemejhuamej nochí cuajli. Niman ma mechejehuili nemoespíritu, nemoalma niman nemotlalnacayo para xquipias ijtlacohualistli ijcuac huajlas toTeco Jesucristo.

<sup>24</sup> On yejhuan omechnotz quichihuas nochí yejhua in, pampa yejhua nochipa quichihua on tlen yejhua quimelajcailtohua.

<sup>25</sup> Nocnihuan, xchihuacan oración topampa.

<sup>26</sup> Xquintlajpalocan nochimej tocnihuan ican hueyi tetlajsojtlalistli\*.

<sup>27</sup> Nemechnahuatia ican itlanahuatil toTeco ma quinomachtican yejhua in tlajcuilolamatl ixpan nochimej tocnihuan.

---

§ **5:22** cosas      \* **5:26** Ipan griego quijtohua: “ican yectli tlatencualistli.” Tlatencualistli quitosnequi beso.

**28** Ma itlatiochihualis toTeco Jesucristo onya nemotech. Ma ijqui nochihua.

**In yencuic iyectlajtoltzin Dios itech ica  
toTeco Jesucristo  
New Testament in Nahuatl, Guerrero  
(MX:ngu:Nahuatl, Guerrero)**

copyright © 1987 Wycliffe Bible Translators, Inc.

Language: Nahuatl, Guerrero

Translation by: Wycliffe Bible Translators, Inc.

Náhuatl, Guerrero [ngu], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Nahuatl, Guerrero

**© 1987, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
f85e296d-89bd-5d7f-b7c2-328bd8e643b1